

§. 5. Sed hæc indistinctionis & Materiæ seu Numeri consideratio magis *interna* dici potest, quæ Corpus ab intra spectatum, h. e. partes intra complexum Corporis comprehensas & inter se relatas, concernit.

Præter hanc, etiam *externa* Materiæ vel Corporis indistinctè spectati consideratio datur, quâ (nullâ partium mentione factâ) Corpus, tanquam *totum* subjectum, *extra se* refertur ad alia subjecta, sed similiter, ut ipsum, indistinctè spectanda, non attendendo modum corporis specialem, quo ab illis aliis subjectis differt, & in esse proprio constituitur; sed respiciendo saltem communem rationem subjectivam, quâ Corpus cum illis subjectis convenit, ipsisque *simile* vel *æquale*, vel, quod perinde est, cum ipsis *idem*, dici potest.

§. 6. Hic ipse conceptus indistinctus Corporis, ut totius ad extra relati, *Materiam* quasi *respectivam* Corporis suppeditat, quæ nomen *Generis* sustinet. Indistinctus enim totius Corporis conceptus, ad extra, dicitur *Conceptus genericus*, & absolutè **GENUS**, quod in ipso Corpore nihil aliud est, quàm indistincta Corporis conceptibilitas, quâ totum, sine distinctione suæ proprietatis ab aliis totis aliter constitutis, potius æquè ac alia tota subjecta, (similiter ut alia,) concipitur, ut eatenus *idem* cum aliis esse dici possit. Ita Silex indistinctè consideratus, sed ad extra v. g. ad Gemmam similiter indistinctè spectatam relatus, cum ipsâ convenit in materiâ respectivâ tanquam in eodem genere. Nam similitudo vel æqualitas, h. e. æqualis conceptibilitas, quâ silex cum gemmâ convenit, v. g. *mineralitas*, largitur conceptum genericum, & materialem ad extra, quâ silex indistinctus est à gemmâ, quâ non differt à gemmâ, sive quâ similis, & quidem summè similis, i. e. æqualis est gemmæ, quâ cum gemmâ dici potest *idem*. Silex enim est Minerale; sed & gemma est minerale; ergò silex & gemma, saltem eatenus, *idem* sunt, quatenus communem rationem inter se foveant.

§. 7. Et sic ad puram Corporis suppositionem spectat **GENUS**, quod idem est ac *Materia* seu *Numerus*, nisi quod *Genus* respectum simul ad extra connotet in toto Corpore, cum *Numerus* partium & inexistens *Materia* constitutiva saltem intra substantiam Corporis terminentur. Est enim *Genus*, quatenus in Corpore spectatur, nihil a-